

Jom Lepak @Masjid Kg. Marhum Pekan Lebarikan Hubungan UMP dengan Komuniti



Pekan, 11 Mac - Pusat Islam dan Pembangunan Insan (PIMPIN) Universiti Malaysia Pahang (UMP) terus melebarkan sayap ukhwah dalam menjayakan Program Jom Lepak @ Masjid dengan kerjasama Masjid Kg. Marhum Pekan baru-baru ini.

Program ini adalah kesinambungan daripada program yang telah dijalankan dengan jayanya di Masjid Taqwa, Masjid Tanjung Selangor, Masjid Paya Bungor dan Masjid Lama Permatang Badak Kuantan yang dianjurkan pada tahun lalu.

Menurut Pengarah Program Jom Lepak @ Masjid, Ustaz Shahrul Nizam Md Ahir, lokasi kali ini adalah salah satu siri jelajah komuniti dan revolusi dalam penjenamaan UMP bagi program khidmat komuniti.

"Melalui program ini diterapkan elemen dakwah, ibadah dan khidmat sosial kepada masyarakat setempat sekaligus membuktikan hubungan erat mahasiswa universiti dan komuniti. Program ini juga dapat mengajak masyarakat setempat terutama generasi muda mengimarahkan masjid dengan menjadikan masjid sebagai medium bagi warga UMP untuk berbakti kepada masyarakat setempat," katanya.

Program dua hari itu melibatkan 60 orang mahasiswa UMP dari kedua-dua kampus UMP di Pekan dan Gambang. Antara aktiviti yang dijalankan ialah Forum Muqarabin yang bertajuk "Celik Mata vs Buta Hati" yang membariskan panel forum iaitu Pensyarah Kanan Pusat Bahasa Moden dan Sains Kemanusiaan (PBMSK), Al-Fadhil Dr. Hilmi Md Said dan Penolong Pengarah Bahagian Pengurusan Masjid dan Surau, Jabatan Agama Islam Pahang (JAIP), Al-Fadhil Ustaz Nik Ibrahim Nik Abdullah .



Menurut Ustaz Nik Ibrahim, aspek penyucian hati perlu dititikberatkan oleh setiap insan yang bergelar manusia agar pengiktirafan Allah kepada manusia sebagai khalifah di muka bumi ini benar-benar direalisasikan.

Katanya, menjadi suatu bentuk kehinaan apabila manusia yang diciptakan sempurna dari sudut akal, pancaindera, tatasusila lebih-lebih lagi turut dibekalkan dengan bimbingan wahyu membutakan hatinya daripada melihat dan mengakui kebenaran semata-mata mengejar kepentingan yang semuanya bersifat sementara.

Selain itu, antara aktiviti lain yang dijalankan ialah program Qiamullail, kuliah subuh, dan bergotong-royong membersihkan masjid bersama Jemaah Masjid Kg. Marhum Pekan. Turut hadir Pengarah PIMPIN, Dr. Mahyuddin Ismail dan Pengerusi Masjid Kampung Marhum, Adnan Baharudin.

Disediakan oleh Ustaz Hasnur Abdul Hamid dari Pusat Islam dan Pembangunan Insan.

Posted By : NORHIDAYAH BINTI MOHAMAD Date Posted : 22-03-2017, 15:42:20